



دی ہنسیے زارگلو ملازمت ہتو ذبنار بغائے۔ بو وخت پہار شوخشیکو کمپنیہ بو ملازمتار دی فارغ ارینی۔ بیہ لو ہو دیہو رویانے، رشتہ دارانانے وا دوستانانے دی پتہ ہوئے۔ زارگلو پیسو ضرورت دی ہونی۔ بیس کوستے دیہہ وام کی دیتی اسیتائے ہتیتانے فون کوری تان مجبور یو لوو دی پرائے۔ ہنسیے زارگلو ہتے ملگیری وا رشتہ داراچی غیستی باو ہانی۔ کورا کورا موژو دیتی کورا کا ہو بشارو گانینی۔ شروع کمپنیو ملگیری دی فون کوری بشارگاناؤ اوشونی۔ کیاغ ضرورتہ رے خبر گانینی۔ ہنسیے ہتیت دی اچی غیستی ہونی۔

زار گل لوٹ شہرہ بی تان ژورو پاشیتائے۔ ہسپتالہ ہے خیقو جو بارہ ٹسٹ بندیتانی۔ ہے ٹسٹان کوری ڈاکٹرو پاشیکو بیت ہوتین مشقاری پرانی کی تہ ژورو علاج ہوئے، بیس ٹھیک ٹھاک ہوئے مگم وخت لیگور وا پیسہ دی خرچ ہونی۔ زارگل دون دونہ ہوئے، ہو دستہ کیہ پیسہ کی اوشونی ہتیت ختم بیٹی اوشونی۔ ملازمت دی ہوستار بی اوشوئے مگم وا دی تان رویانے خدمت کوریک اوچے رویان ہو خوششیکیو یادی انگیتی ہو تسلی ہوئے کی ہو جم جم دوستان، رشتہ داران ہو بیہ ضرورتو وختہ البت ہو اچی غیستی نوکونی۔ بیس ژورو علاجو شروع اریر کیاغ کی ہو جیپو اوشونی ہتیت ختم ہونی مگم ژور دی انوسار انوسوتے بینوز باو ہائے۔ زارگلو حالت ہو دیہہ پتہ ہوئے کی زارگلو ژورو لہازیہ بو خرچہ بیرو بیرائے وا زارگل وے پیسوؤ اساک بیرائے۔ ملگریان فون دی بند ہونی۔ شو یو رشتہ دار دی کورا موژو دیاؤ فون کونی وا سرسری بشار کوراؤ شاؤ فونو بند کونی۔ زارگل تان کورا کی فون کوئے دی ملگیری وا رشتہ دار کیاوت فونو نو اوسنئینی وا کیاوت اوسنئییے بہنہ کوری بند کونی۔

شروع شروع زارگل بیہ لوو ہوش نو اریر۔ سادہ جم خصلتو سوم موش اوشوئے مگم وخت شوخشاؤ گیکو زارگل دی بیہ لوو ہوش اریر کی ہمی روئے فلکو یار بیرانی، ہنسیے سف مہ پیشہیتانی۔ ترئے سال پہار بغائے، آخرہ ژور جم صحت مند ہوئے مگم نیوف لاک روپیہ وام دی ہوئے۔ ہسپتالہ پیسان شاؤ انگئے رے شناختی کارڈو ضبط ارینی۔ زارگل ایگان کوری تان ہتے ملگریانے وا رشتہ دارانانے کاکی زارگل پہار ییار گیکو چھوئے انوس ہوسوم ہال باویز باو اوشونی بیتان سارمدد مشکیتائے۔ لیکن بیتان سفان تان تان مسئلہ اوشونی، ہتیت خیق دی زیاد ہونی۔ ہمدریو لوو ہوسوم دیکو بچین کا تیارنوبونی۔ بیس تان زمینان بیزی می خرچان پورا اریر۔

ژورو گانی افار ہائے صرف زارگلو ڈورو روئے اوچے ہے پھوک ژورو واؤ پبان سار غیر کا ویریگی نو نیسیتانی۔ زارگل بو حیران ہوئے۔ دونیتائے او شوم ہوتامہ یا ہمی روئے بو مصروف ہونی۔ او پروشٹی جم اوشوتامہ یا ہمی روئے اچہ شوم ہونی۔ ژورو جام بیکو خوشانیہ زارگل ہمی لووان موژی نو پرائے۔ کندوری وخت پہار بغائے کیاوت کی زارگلو تین بیروز گاریو احساس ہوئے وا ڈورو حالت رانہ ران نازک باو ہانی تھے زارگلو دی بردی تنگ اریر۔ ای انوس بیس تان بیگو لوژی تان صلاحیتان کاغذان پوشی ہو خیالی ہائے کی او تان ہمی صلاحیتان گانی پونہ بی کونو نیشیمان، کا ہمیتان سار فائدہ گانینی۔ بیہ خیال ہتوژانی گیتی بیس تان سف صلاحیتان کاغذان گانی بی پونہ ای کانو چھاغہ روپھی تان صلاحیتان پروشہ درئے ہواز دیک شروع اریر۔ او صلاحیت بیزی میمان کا نوگانیمیانہ ؟ ہو خیال ہش اوشوئے کی او بیرو کوسیرو موش ہر قسمو کورمو چال مت گویان۔ ہرکا مہ ہمی صلاحیتان سار فائدہ اوسنئینی مت دی فائدہ ہوئے وا رویانے دی فائدہ ہوئے۔ بیس قوشت اریر، بینر چاکنیتائے مگم ہونسہ کا نوتان ہانی۔ چھوچی روپھی شام ہوئے کا ہونسہ نو ہانی۔ بیس شام بیکو اچی ڈوروتین بغائے تان کاغذاتان بڑاٹھئے۔

اوبتی چھوچی بیکو وا ہائے ہے ژاغا روپھی قوشت اریر کاکیہ ویزی نو ارینی۔ کندوری وقت ہموش پہار بغائے۔ قوشت کویان، ہواز دویان کا ہونسہ گیکو روادار نو ہونی۔ بیس کندوری وخت بیہ قسمہ تیرنیتائے کا ہونسہ نوگیکو بو بردی چھین ہوئے۔ ای انوس تان ہے ژاغا گیتی روپھی اسیتائے، گرمیو مس اوشوئے، چھوچی روپھی دی ہاسی نو بیٹی اسیتائے، خویانو خالی آخر خسمت بیٹی ہے کانو موژا پوری اورراری بغائے۔ کندوری زمانہ اچہ خیلہ مڑاغ بیٹی انگاہ ہوئے۔ انگاہ بیٹی لاژیران کی ای طوفان نیسی شیر، گان کویان ہوتے صلاحیتان ہتے کاغذان زیادین گان گانی التی شیر۔ ای کما کاغذ بیرا شینی، ہتیتان سورا ای گدائے رینی گیتی پوری اسور۔ بیس انگاہ بیٹی ہے رینیو پوشی ہو قہر دی ہائے وا ہو ہوسارو دی ہائے۔ بیس بوتنگ بیٹی اسیتائے پیغین دیتی بیس تان ہے صلاحیتان کاغذان وا کیہ غورا نو گیتی رینیو موژا شیرو ہے کاغذان دی اف پیٹھی ڈوروت راہی اریر ہمیت وا مہ کیہ کورمہ گونیان رے۔

زار گلو ڈور شہراری پھوک دودیری اوشوئے۔ بیس ہے وجہین دیتی کندوری زمانہ وا بازارو نوہائے۔ اینگار دی بیس کیہ کوروم نو لے بردی چھین بیٹی اسیتائے۔ بوزمانہ اچہ بیس وا کیہ کورمہ بازارو گیتی ہتے موژین پہار بوغآؤ اوشوئے لوژیتائے کی بوروئے ایغو کوٹھووا ہوست دیتی کھانجتو کوری کیاغ لاژینیان۔ بیس دی غیر ارادی طوراً ہے ویشکی بغائے۔ بیرہ بی لوژیتائے کی بیت ای کورمو باریہ اشتہارو لاژینیان۔ بو وخت بیس دی بیرہ روپھیتائے تھے ہوتین دی ہے اشتہارو لوژیکو تین ژاغہ نیستائے۔ ژاغہ نیسیکو بیس لوژیتائے کی بیرو ای کمپنیو اشتہار۔ ہے اشتہارو لوژی ہورو بیرو اسیکو زمانو ای ٹرینینگ ہو

یادی ہائے کی بیس ای کمپنیو سوم کوروم کوراوا ہے ٹریننگو کوری اسیتائے۔ دی بنیسے بیس ڈون دونہ ہوئے کی بیس تان صلاحیتان گانی بازارو بیزیمیکو گیاوا بیس ہے کاغذو گانی گیتی استایانووا؟ بنیسے بیس ہتے وختو بچین دونیتائے کھیو گان گانی التی اسیتائے وا کھیو سورا رینی گیتی پوریکو بیس تان بیتان اف پیخھی بی اسیتائے۔ ہے وختہ طوفان نیسی ہے کاغذان کوئیی غیرئے التی اوشوئے۔ بیس اینگار دی بی تان ہتے روپھیرو ژاغا بی کندوری مودہ روپھیتائے وا ہے ہائی لوژی وا سیرو ٹیکا بی ہتے گوچو لوژی ہش کیاغ ہو یادی نو گیتی بو بدطبیعت بیسی ہے کمپنیو پتو نیویشی تان سوم گانی تان بازارو کورمو کوری ڈوروتین راہی اریر۔ ڈورہ توری پھوک ژورو غیچہہ باہ اریر بیس بابا رے ہو گوژی چوکیتائے مگم لوژیکو زارگل خلیزیر اسور۔ ہواژغال ہوش اریر کی کیہ مسئلہ بیسی شیررے۔ ہواژغال ہوتین چائے کوری الائے، چائے پی ہو طبیعت پھوک برابر بیکو ہشار اریر کی اے شیرینو ت کیہ معاملہ کو بد طبیعت اسوس۔ دنیو کورمان بچین پریشان نو بیلک خدائے رزقو وام دار۔ زارگل ریر کی لوو کھیو دوم کوروم کی ہوستوتین نو ہائے کیہ دی بہنہ باک بیرائے۔ بیرو کمپنیہ کوروم شیر، ہتیرہ صلاحیتان کاغذو مشکینیان۔ ہے تجربہ ہائی کوسوم نوبوئے۔ اوا ہے ٹریننگو کوری سوم مگم اوا تان صلاحیتان کاغذو کورا پیخھی اسوم۔ ای ژوت کاغذاتان گانی چھترارو بی اسیتام ہتیتان ہتو کورا تونجئیتامہ کیاغ اریتام۔ اژغال ریر کی پریشان موبوس اسپہ رزق کی ہتے کمپنیہ شیرائے کا دی اسپہ سار گانیکو نوبونی۔ خدائے اسپت دوئے ہائی کورہ کی شیرائے اوا مشکیم۔ شیرینو نان تان اساقالو تسلی پرائے وا ریتائے کی رزقو مالک خدائے ہرزانلہ کوری دوئے۔ خدائے کیاوت دی اسپہ کوس پھانہ محتاج نوکوئے۔ خدائے اسپہ پیدا کوری اسور ریتائے۔ جوش بسو وخت اوشوئے ہے کمپنیہ صلاحیتان کاغذو جمع کوریکو بچین۔ ہش بیسی ہے جوش بس پھار بغائے، بیس مایوس ہوئے وا ہش سارئیتائے کی بیس تان ہوستین تان رزقو پیژینگ دیرووغون۔ ہویقین ہوئے کی ہے کاغذ دی البت ہتے اف پیخھیرو کاغذان موژی اوشوئے رے۔ ہو اژغال دی ڈوری شیرو ہر ای کاغذو لوژیتائے مگم نو لیتائے وا زارگلوتین لُونوپرائے۔

ای کمہ بس وا پھار شوخیتائے۔ ای انوس شیرینو نان زارگلو پونج سال پروشٹی پھارار گیکو وختو سوٹ کیسو کی ہسے خراب بیسی ڈورو ای گوچہہ پیخھی اوشوئے، ہمواف پیخھوم رے سوٹ کیسو دوہتو اہی ہوری لوژیتائے کی پلاسٹک بانو چاکئے ای ورق ہتو لاکھی شیر۔ ہے سرٹیفیکٹو لو وا ہتو یادی نو گیتی بیہ ضروری کیاغ ہوئے رے التی شیرینو توت پرائے۔ اے بیہ کیہ کاغذ تہ پرانو سوٹ کیسو شیرائے ریتائے۔ ختانی کیاغ دی ٹیپ بی شینی اوا ہے پرانو سوٹ کیسو اف پیخھوم رے لوژیتام کی بیہ ہتو شیر۔ زارگل ہے صلاحیتان کاغذو لے دون دونہ بیسی جو بس خورملا ل ہوئے۔ کوریکو کی ہو تاریخ پھار بی اوشوئے۔ جو بس اچہ ہے لوو تان اژغالوتین نو دیتی درخواست نیویشی گانی ہے کاغذو سوم کوری مہ چھترارو پھوک کوروم شیررے راہی اریر۔ چھترارہ توری ہے دفتر ویشکی بغائے۔ بیس ناباوار بیسی ہے دفتر شانہ بغائے کی نوٹس بورڈتو ای درخواست چاکئے شیر۔ ہسے پریشان بیسی ہتو لوژیتائے کی ہے متعلقہ پوسٹو نفری کا ملاؤ نو بیکو وختو ای کمہ بس خور زیادئیرو بیرانی وا ہنون ہے بچین درخواست دیکو آخری انوس بیرائے۔

بیس تان درخواست اوچے صلاحیتان سرٹیفیکٹو ہے دفتر جمع کوریکو ہوتین پھوک نیسی انتظار کوریتانی۔ ہے آخری انوس دی ہے وختہ پت خورنفری کا درخواست جمع نو کارڈو بیرانی۔ پھوک مودہ اچہ ہو اہی مشکی ہو سار ہو کورمو تجربو ہشارو کوری ای کاغذو ہوت دیتی ریتانی کی تو تان سفری کاغذان انتظامو کو اسپہ شاؤتتین فون کوسی رے ہو ویشئیتانی۔ زارگل ناباوار بیسی دفتر بیرنی نیسی بیہ خوشپہ یا ژوسپہ رے حیران بیسی دونیکا پرائے۔ ہانیہ تو اژغالو بیہ لو تو یادی ہائے "خدائے رزقو وامدار" بیس تان ڈورو ویشکی راہی اریر۔

